



Convenio entre a Consellería de Cultura, Educación e Universidade e a Fundación Laboral da Construción para o recoñecemento da formación preventiva impartida nos centros públicos, dependentes desta consellería, para os efectos da obtención da Tarxeta Profesional da Construción

MEMORIA XUSTIFICATIVA

O Secretario Xeral de Educación e Formación Profesional da Consellería de Cultura, Educación e Universidade,

INFORMA:

Que esta Consellería de Cultura, Educación e Universidade ten previsto formalizar coa Fundación Laboral da Construción o instrumento convencional arriba referido por un período de vixencia de catro anos dende a data da sinatura do convenio.

Que o instrumento convencional ten por obxecto a colaboración no eido da formación profesional entre a Consellería de Cultura, Educación e Universidade e a Fundación Laboral da Construción (en adiante FLC) para a expedición da Tarxeta Profesional da Construción aos titulados en formación profesional inicial.

Que existe converxencia de intereses entre as entidades asinantes en orde á consecución do obxecto referido.

Que o instrumento convencional que se pretende asinar se fundamenta no seguinte:

- En que a Secretaría Xeral de Educación e Formación Profesional é o órgano encargado da xestión das competencias en materia de ordenación do ensino regrado en toda a súa extensión, niveis e graos, modalidades e especialidades; e así mesmo da potenciación da





inserción profesional do alumnado que curse ensinanzas de formación profesional, do fomento do espírito emprendedor e do impulso das relacións entre os responsables da formación, do emprego e da produción, mediante plans de información e establecemento de convenios.

- Que a FLC é unha entidade sen ánimo de lucro constituída polas entidades máis representativas do sector: *Confederación Nacional da Construción (CNC)*, *CCOO de Construcción y Servicios* e a *Federación de Industria, Construcción y Agro de UGT (UGT-FICA)*. A súa finalidade primordial é crear un marco de relacións laborais estables e xustas e prestar servizos aos traballadores e empresas; os seus principais obxectivos son: o fomento da formación profesional, a investigación, o desenvolvemento e a promoción de actuacións tendentes á mellora da saúde laboral e á seguridade no traballo, así como a promoción de actuacións dirixidas á mellora do emprego.
- No VI Convenio Xeral do Sector da Construción que establece:
 - no punto 2 do seu artigo 135, principios xerais, que as accións e actuacións a realizar en relación cos contidos da Lei 31/1995, de 8 de novembro, de prevención de riscos laborais no sector da construción e a Lei 32/2006, de 18 de outubro, reguladora da subcontratación no sector da construción, teñen que ser análogas, homoxéneas e coordinadas en todo o territorio nacional. Á FLC correspóndelle ser o fío condutor dos principios e directrices a desenvolver nos programas formativos e contidos específicos de carácter sectorial e para os traballos de cada especialidade, a fin de que de forma equivalente se establezan os mesmos niveis de aplicación e cumprimento en cada un dos Consellos Territoriais.
 - no punto 1 do artigo 148 que a Tarxeta Profesional da Construción é o documento expedido pola FLC que constitúe unha forma de acreditar, entre outros datos, a formación específica recibida do sector polo traballador en materia de prevención de riscos laborais, así como a categoría profesional do traballador e os períodos de ocupación nas distintas empresas nas que vaia exercendo a súa actividade.
- Que a formación profesional que se imparte nos centros públicos, dependentes Consellería de Cultura, Educación e Universidade, inclúe, ademais da obtención do certificado de nivel





básico en prevención de riscos laborais, unha formación específica en prevención de riscos laborais propios de cada profesión.

- No interese das partes en colaborar en todos aqueles aspectos que melloren as competencias do alumnado de formación profesional e se adapten ás actuais necesidades formativas do mercado laboral e así conduzan á súa óptima inserción laboral.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, do 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria en Santiago de Compostela.

